



22.10.2013

2013/91

Naqqiut

Siunnersuut 25. Juni 2013-meersoq taarserpaa.

Una naqqiutigineqarpoq: Naalagaaffiit Peqatigiit 68-issaa Ataatsimeersuarneranni – imatut naqqippoq: Naalagaaffiit Peqatigiit 69-issaa Ataatsimeersuarneranni.

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqummiunneqarpoq:

Alta-mi inaarutaasumik isumaqatigiissutip (The Alta Document) taassumalu nassatari-saanik pingaarnertut kaammattuutigineqartut 4-it, nunat tamalaat akornanni nittar-sanneqarnissaanut, kiisalu Naalagaaffiit Peqatigiit nunat inuui pillugit 2014-imi nunar-suaq tamakkerlugu ataatsimeersuartitsinissaanut inaarutaasumik isumaqatigiissutip Naalagaaffiit Peqatigiit 69-issaa Ataatsimeersuarneranni pisortatigoortumik allagaati-gilissagaat pillugu Naalakkersuisut suliaqaqqullugit Inatsisartut aalajangiiffigisassa-atut siunnersuut.

(Inatsisartunut ilaasortaq Sara Olsvig, Inuit Ataqatigiit)

Tungavilersuut:

Naalagaaffiit Peqatigiit septemberimi 2014-imi ataatsimeersuarnissaani nunat inuui pillugit Naalagaaffiit Peqatigiit ataanni nunarsuaq tamakkerlugu ataatsimeersuartitsisoqassaaq. Ataatsimeersuarnissaq aalajangerneqarpoq Naalagaaffiit Peqatigiit aalajangerneranni 65/198 decemberip 21-ani 2010-mi naalagaaffinnit arlaqaqisunit tapersersorneqarluni, soorlu Naalagaaffeqatigiit aamma tapersiisut.

Nunarsuarmi nunat inuui pillugit ataatsimeersuarnissap Naalagaaffiit Peqatigiinnit aalajangi-unneqarnerata kingorna nunat inuuisa piareersaanerit sukumiisut ingerlassimavaat. Nunat inuuisa nunarsuarmi aggulunneqarnerini arfineq marluusuni peqataaffigineqartumik piareersaa-taasumik ataatsimiittoqartarsimavoq, soorluttaaq nunarsuaq tamakkerlugu piareersaatasumik aamma ataatsimiittoqartarsimasoq Alta-mi ataatsimeersuarnermik kinguneqartinneqartumik. Ilaatigut nunat inuuisa nunarsuarmi aggulunneqarnerini arfineq marluusuni tamanit peqataaf-figineqartumik Københavnimi isumasioqatigiittoqarsimavoq, tassanilu danskit nunanut allan-ut ministeriat aammalu Nunatsinnit Naalakkersuisunut siulittaasuusimasoq peqataapput. Isu-masioqatigiinnermi tassani taakku marluullutik nunat inuuisa sinniisaasa Nunarsuaq tamak-kerlugu Ataatsimeersuarnissami peqataatinneqassasut tamakkiisumik tapersersorpaat, soor-luttaaq Nunarsuaq tamakkerlugu ataatsimeersuartitsinis-sap piareersarneqarnera aamma taper-sersorneqartoq.

Københavnimi isumasioqatigiinnerup kingunerivaa nunarsuarmi nunat inuiisa ataqatigiissaa-
risussanik pilersitsinerat taakkulu Altami ataatsimiinneq piviusunngortippaat Altamilu
inaarutaasumik nalunaarutip piviusunngortinnissaa aqutissiuullugu.

Altami ataatsimeersuarneq iluatsilluarpoq, nunarsuami nunat inuiisa aggulunneqarfii arfineq
marluusut tamarmik peqataatitaqarput, nunarsuarmilu nunap inuiisa Altami inaarutaasumik
nalunaarut ”Alta Outcome Document” isumaqatigiissutigaat.

Suliaq tullinnguuttoq tassaassaaq qulakkiissallugu nunat inuiisa sammisassatut nammineq
toqqagaat Naalagaaffiit Peqatigiit nunarsuaq tamakkerlugu peqataaffiusumik ataatsimeersu-
arnissaani sammineqartinnissaat Altamilu inaarutaasumik isumaqatigiissutip pisortatigoortu-
mik Naalagaaffiit Peqatigiinni allagaatinnngortinnissaa, taamaalilluni naalagaaffiit peqataasut
tamarmik nalunaarummut isummersinnaaqqullugit.

Altami inaarutaasumik nalunaarutip sisamanut immikkoortunut aggulunneqarsimasup FN-imi
naalagaaffiit kaammattorpai nunat inoqqaavisa pisinnaatitaaffiik nalunaarut 2007-imi
aalajangiunneqartumi isumaqatigiissutigineqartut piviusumik timitalersuiffigineqalissasut.
Maanna anguniarneqalerpoq nunat inoqqaavisa pisinnaatitaaffiisa nalunaarummi naqissuser-
neqarsimasut aamma piviusunngortinniarneqalissasut. Altami ataatsimeersuarnermit inner-
suussutaasoq tassaavoq FN-i nutaamik nakkutilliffimmik pilersitsissasoq, aamma nunat inoq-
qaavisa pisinnaatitaaffiisa eqqortumik atuut-sinneqarnissaat anguniarlugu naalagaaffiit nunani
nunallu ilaani atuuttunik nak-kutilliilernissaminnik qulakkeerinneqataaqqullugit.

Altami inaarutaasumik nalunaarummi innersuussutit ilagaat nunagisamut, territorianut pisuus-
sutinullu nammineq aalajangiinissamut pisinnaatitaaneq, nerisaqarnikkut isumannaatsumik
toqqissisimanissamut pisinnaatitaaneq, sakkutooqarfinngortinneqannginnissamik pisinnaati-
taaneq aammalu aalajangiisarnerni peqataatinneqarnissamik pisinnaatitaaneq, aamma nunat
assigiinngitsut akornanni isumaqatigiinniarnerni tamanna pigaangat.

Taamaammat Altami nalunaarutip Nunatsinniit aamma peqataaffigineqartumik avammut nit-
tarsanneqarnissaa paasititsiniutigineqarnissaalu pingaaruteqarluinnartuuvoq, nunami maani
naalagaaffeqatigiinnilu, danskit naalackersuisuisa taamaaliornikkut nalunaarut aamma ilu-
moorfigalugu pimoorutilissammassuk tikiffimminnullu ajornanngikkaangat paasisitsiniutigi-
sarlugu, taama iliornikkummi nunani tamalaani Altamit nalunaarut annertunerpaamik ilisima-
neqarnerulissammat nunarsuarmilu peqataaffigineqartumik nunat inuiisa ataatsimeersuarne-
saat aamma alaatsinaanneqarnerulerluni.

Pisortanut aningaasaqarnikkut allaffissornikkullu kingunissai

Soqanngilaq

Namminersortunut aningaasaqarnikkut allaffissornikkullu kingunissai.

Soqanngilaq

Innuttaasunut aningaasaqarnikkut allaffissornikkullu kingunissai

Innuttaasunut aningaasarsiornikkut allaffissornikkullu kinguneqarnissaa ilimagineqanngilaq.